

Najib umum kadar diskaun untuk pengguna ERL, komuter
Astro Awani
Disember 12, 2015
Oleh Astro Awani

NAJIB: Kerajaan memahami kemarahan rakyat mengenai kenaikan tambang perkhidmatan pengangkutan.

KUALA LUMPUR: Presiden UMNO Datuk Seri Najib Razak menggunakan sesi penggulungan Perhimpunan Agung UMNO 2015 untuk memberi penjelasan berhubung kenaikan kos sara hidup yang menyebabkan meningkatnya harga bagi beberapa perkhidmatan.

Antara perkara yang disentuh oleh beliau dalam ucapannya di Pusat Dagangan Dunia Putra (PWTC) itu termasuklah mengenai tambang Express Rail Link Sdn. Bhd (ERL) yang baru-baru ini dinaikkan daripada RM35 ringgit kepada RM55.

Perdana Menteri berkata, beliau faham rakyat marah dengan kenaikan harga berkenaan, namun kerajaan tiada pilihan kerana jika kenaikan itu tidak diberikan, kerajaan terpaksa membayar pampasan yang tinggi serta secara berterusan.

Menurutnya, kerajaan kini menanggung kos pemberian pampasan yang setiap tahun tiada kenaikan tambang ERL. Jumlah pampasan yang dibayar setakat ini, kata beliau, berjumlah RM2.9 bilion.

Prihatin dengan keluhan rakyat yang terkesan dengan kenaikan tambang ERL itu serta beberapa perkhidmatan lain, termasuk komuter, Najib turut mengumumkan beberapa kadar diskaun.

“Antaranya, pelajar ada kad siswa diskaun 30 peratus, kakitangan awam dengan kad bulanan. Bagi komuter, pelajar (diberikan) diskaun 50-70 peratus termasuk untuk pelajar universiti,” ujar beliau.

Di samping itu, Najib turut mengarahkan Kementerian Perdagangan Dalam Negeri, Koperasi dan Kepenggunaan (KPDNKK) untuk meningkatkan pemantauan dan penguatkuasan bagi memastikan tidak berlaku kenaikan harga barangan.

“Periksa lagi. Tambah penguatkuasan di lapangan (supaya) harga turun. Jangan senang (sesuka) hati nak naikkan harga. Barang keperluan kena turun,” katanya.

© 2015 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/najib-umum-kadar-diskaun-untuk-pengguna-erl-komuter-84866>